

AAQQIISSUT
Akissuteqaammut 04. oktober 2010-meersumut taarsiut

Nunani avannarlerni killerni utoqqarnut tunngasut pillugit suleqatigiinneq paasissutissanillu ingerlatitseqqittarneq annertusaqqullugit Islandimi, Savalimmiuni Kalaallillu Nunaanni naalakkersuisut Nunat Avannarliit Killiit Siunnersuisoqatigiiffiannit kaammattorneqarput.
(Josef Motzfeldt, Aallartitat siulittaasuat)

Akissuteqaat

(Isumaginninnermut Naalakkersuisoq Maliina Abelsen)

Siullermeerneqarnera

Nunani Avannarlerni Killerni Siunnersuisoqatigiinni Inatsisartunit aallartitat siulittaasuannut, Josef Motzfeldt-imut nunat avannarliit killiit inassuteqaataata saqqummiunneqarneranut qujanaq. Naalakkersuisut isumaqarput, inassuteqaammi sammisaq pingaaruteqartorujussuusoq maannakkullu pisumut attuumassuteqarluni.

Siunnersuummi eqqortoq unaavoq, tassalu Nunani Avannarlerni Killerni utoqqaliartortarnikkut ineriartortoqarsimasoq, taamaasilluni innuttaasuni utoqqaat amerlignaluttuinnarlutik inuusuttullu ikiligaluttuinnarlutik. Taamatut ineriartortoqarnera isumaginninnerup tungaatigut ajornartorsiutinik arlalinnik pilersitsisimavoq. Ajornartorsiutit maannakkorpiaq saqqumilaarnerpaat tassaapput utoqqarnut inissanik aamma paaqqinnittarfinni inissanik amigaateqartoqarnera kiisalu paaqqutarinnittarnermik immikkoortortami sulisussanik amigaateqartoqarnera. Naalakkersuisut ilisimavaat, utoqqaat tungaasigut sianiginnittarnerup annertusineqarnissaanut annertuumik pisariaqartitsisoqarnera.

Utoqqaat tungaasigut utoqqaliartornikkut ineriartorneq taassumalu kingunerisaanik ajornartorsiutit Nunani Avannarlerni Killerni imminnut assigiissuteqarput. Taamaattumik iluaqutaasumik nunani avannarlerni killerni nunat killeqarfiit pitaannarlugit sakkortunerusumik suleqatigiissinnaaneq annertunerusumillu paasissutissatigut ingerlatitseqqittarneq iluaqutiginiarneqarsinnaavoq. Tamanna assersuutigalugu pisinnaavoq, oqartussaasut utoqqaat tungaasigut suliaqartut akornanni annertunerusumik isumassarsianik, misilittakkanik aamma ilisimasanik aviffigeqatigiittarnerisigut.

Tassunga atatillugu pingaartuuvoq, utoqqarnut tunngasut immikkoortortaqaarfii pitaannarlugit isiginiarneqarnissaat, tassanimi isumaginninnikkut, aningaasaqarniarnikkut, naatsorsueqqissaartarnikkut, inissaqarniarnikkut, peqqinnissakkut sammisatigullu allatigut ataqatigiittoqarmat. Taamatut utoqqaat tungaanut isiginnittarnerup utoqqaat ajornartorsiutaannik akuttunngitsumik immikkoortortat taakku pitaannarlugit aallaaveqartut, pitsaannerusumik paasineqarsinnaaneritut suliarineqarsinnaanerinullu qulakkeerinnittussaavoq.

Naalakkersuisut isumaqarput utoqqarnut tunngasoq namminersortunut pisortanullu attuumassuteqartutut isigineqartariaqartoq. Immikkoortut taakku marluutillugit utoqqaat tungaasigut paasissutissatigut paarlaasseqatigiittarnermut ilaatinneqartassapput.

Inassuteqaammik malitseqartitsineq oqartussaaffeqarfiit attuumassuteqartut Kalaallit Nunaanniittut, Islandimiittut kiisalu Savalimmiuniittut attavigineqarnerisigut pissaaq, inassuteqaatip qanorpiaq malitseqartinneqarnissaata oqaluuserineqarnissaa siunertaralugu.

Inassuteqaat aningaasatigut kingunerisassaqaqqangilaq, suleqatigiinneq aamma paasissutisseeqatigiittarnissaq atungassiissutaareersut iluini qinnutigineqartassammat.

Isummersuutit taaneqareersut tunngavigalugit Naalakkersuisut kaammattuutigaat, aalajangiiffigisassatut siunnersuut tassalu Inatsisartut Nunat Avannarliit Killiit Siunnersuisoqatigiivisa inassuteqaataannut nr. 2-mut 2009-imeersumut tapersiissuteqassasut, Nunani Avannarlerni Killerni utoqqaat tungaasigut suleqatigiinnerup paasissutissanillu ingerlatitseqqittarnerup annertusarneqarnissaata nukittorsarneqarnissaatalu akuersissutigineqarnissaa.